

## Uz deseti broj „Naših starina”

Pokretanje godišnjaka Zavoda za zaštitu spomenika kulture Bosne i Hercegovine (1953 — 1965) i njegov dosadašnji put praćeni su raznovrsnim teškoćama koje su uspješno prebrođene zahvaljujući odlučnosti i uvjerenju pokretača i Redakcije, kao i podršci nadležnih faktora da je ovakva aktivnost Zavoda od velike koristi za razvoj tek formirane službe zaštite spomenika kulture Bosne i Hercegovine.

Redakcija je stalno imala na umu potrebu obavještavanja kulturne i naučne javnosti, a posebno obavještavanja neposredno zainteresovanih ustanova, društvenih organizacija i ostalih faktora o djelatnosti službe zaštite spomenika kulture naše Republike, što je i bila osnovna namjena časopisa. Nastojali smo pri tome da prilozi saradnika budu što kvalitetniji, da u tehničkom pogledu časopis dostigne savremeni nivo, i da sadržajno ima jasno određenu svoju koncepciju.

Protekli period, naročito njegov prvi dio, karakterišu prilozi koji su bili rezultat aktivnosti na proučavanju i evidenciji spomenika, manje rezultat sintetičnih istraživanja, a što je i odgovaralo uslovima rada ove, kod nas sasvim nove, stručne službe i sastavu njenog kadra.

Danas, nakon 18 godina postojanja Zavoda za zaštitu spomenika kulture SR BiH, te nakon deset svezaka »Naših starina«, smatramo da se mogu zacrtati daljnje kvalitativne promjene u fizionomiji ovoga godišnjaka, koje bi ujedno trebalo da odraze i promjene u samoj službi kojoj godišnjak služi kao sredstvo informacija i razmjene iskustava. U tom smislu, Redakcija smatra da bi sljedeći period trebalo da bude sadržajno drugačiji, a po načinu obrade materijala na kvalitetno višem nivou. Smatramo da ćemo u budućnosti moći više objavljivati stručne konzervatorske zahvate, a naročito one u kojima se bude u metodu, materijalu i drugome nešto novo primijenilo. Naučnu gradu trebalo bi davati konciznije i ići više na studije i sinteze. Pri tome, naravno, orijentacija će i dalje biti na pretežnom angažovanju vlastitih stručnih snaga i na tretmanu spomeničkog fonda Bosne i Hercegovine.

»Naše starine« su dosada obuhvaćale i zaštitu prirode koja je u organizacionom pogledu predstavljala jedan od sektora djelatnosti Zavoda za zaštitu spomenika kulture SR BiH, pa je bilo logično da tu materiju ne ostavimo po strani. Mišljenje je Redakcije, međutim, da bi bio mnogo srećniji izlaz ako bi se ta materija razrađivala u posebnom časopisu koji bi izlazio pod odgovarajućim nazivom.

Na saradnji u »Našim starinama« dosada je učestvovalo 66 internih i vanjskih saradnika koji su objavili 208 priloga od kojih je relativno najveći broj tretirao oblast arhitektonskog i likovnog nasljeđa Bosne i Hercegovine i područje zaštite prirode, a manje oblast zaštite spomenika narodne revolucije, etnografije i tehničke kulture, čemu je razlog pomanjkanje ove materije.

U osvrtu na protekli period, analizirajući uspjehe i nedostatke, stekli smo uvjerenje da »Naše starine« imaju ne samo svoje opravdanje nego i sve veću društvenu potrebu, obzirom na okolnost da Bosna i Hercegovina ima brojna, raznovrsna i visoko vrijedna sredstva svog kulturnog nasljeđa za koji je zainteresovana ne samo domaća već i strana javnost. Zato Redakcija s mnogo nade i pod povoljnijim uslovima ulazi u drugi desetljetni period u nastojanju da časopis opravda povjerenje koje u njega polaže naše društvo. Uvjereni smo da se u našim očekivanjima nećemo prevariti, i da priznanja koja smo dobili od strane naših čitalaca i zainteresovanih društvenih faktora, neće ni u budućnosti izostati.

Redakcija